



Број/Број: 03/1-50-1-9-9а/07
Сарајево/Сарајево, 29. 10. 2007. године

n/r чланова Заједничке комисије за одбрану и сигурност БиХ

PREDMET: Izvještaj o posjeti Parlamentu i organima izvršne vlasti Savezne Republike Njemačke
(veza-predmet broj: 03/1-50-1-9-6a/07)

U periodu od 24.do 26. oktobra 2007. godine članovi Zajedničke komisije za odbranu i sigurnost BiH (u daljnjem tekstu: Zajednička komisija) posjetili su Parlament, Ministarstvo vanjskih poslova, Ministarstvo odbrane Savezne Republike Njemačke (SRNJ). Delegaciju Zajedničke komisije činili su: Branko Zrno, predsjedavajući, Šefik Džaferović i Slobodan Šaraba, zamjenici predsjedavajućeg, Drago Kalabić, Vinko Zorić, Adem Huskić, Jozo Križanović, Mirko Okolić i Hazim Rančić, članovi, Dragica Hinić, sekretar, i Željko Grubešić, stručni savjetnik. S delegacijom su putovali Christian Haupt i Jasna Dragičević iz Misije OSCE-a u BiH. Razgovorima u Parlamentu i Ministarstvu odbrane prisustvovao je ambasador BiH u SR Njemačkoj N.J.E. Mitar Kujundžić. Posjeta SR Njemačkoj realizirana je uz podršku Misije OSCE-a u BiH.

24. oktobar 2007.

Prvog dana posjete delegacija Zajedničke komisije posjetila je Parlament SR Njemačke i razgovarala s njegovim predstavnicima. Delegaciju je po dolasku u zgradu Bundestaga pozdravila gđa Ulrike Merten, predsjednica Komisije za odbranu Bundestaga.

1. Prvi susret upriličio je dr. Winkelmann, zamjenik direktora Odjela parlamentarnih službi. Dr. Winkelmann upoznao je članove Zajedničke komisije s principima rada i funkcioniranjem Bundestaga. Objasnio je odnos zakonodavne i izvršne vlasti, funkcioniranje savezne države, relacije sa 16 pokrajinskih parlamenata i vlada, procedure izrade i donošenja zakona, način glasanja i rad Bundestaga tokom kalendarske godine. Bundestag ima 613 poslanika, a zasjeda u plenumu 22 radne sedmice u godini. Parlamentarne komisije zasjedaju srijedom i, po pravilu, njihov rad zatvoren je za javnost.

Dr. Winkelmann objasnio je i rad parlamentarne administracije, službi, te osoblja koje je neposredno u službi poslanika. Naime, pored stalno zaposlenog osoblja, svaki poslanik ima pravo zaposliti saradnike koji neposredno rade i opslužuju njegov ured. Ukupno ima oko 2500 zaposlenih. Precizirani su novčani iznosi koji su na raspolaganju za administrativne i lične potrebe. Sve to prate jasno određena pravila i disciplinski kodeks koji je obavezujući za svakog poslanika. Nakon izlaganja dr. Winkelmanna, članovi delegacije postavljali su konkretna pitanja o radu i procedurama rada u Bundestagu. U razgovoru je šire sagledan rad aktuelnog saziva Bundestaga.

2. Potom je slijedio sastanak s predstavnicima Istraživačke grupe za sigurnosnu politiku Fondacije za nauku i politiku.

Tokom sastanka razmijenjena su mišljenja o aktuelnoj situaciji u Bosni i Hercegovini. Posebno se razgovaralo o reformi odbrane, Sigurnosnoj politici BiH, aktuelnostima vezanim za reformu policije i Ustava BiH. Sastanak je bio neformalnog karaktera.

3. Sastanak s predsjednikom Komisije za unutrašnja pitanja Bundestaga gosp. Sebastianom Edathyem

Tokom sastanka razmijenjena su mišljenja i iskustva u radu komisija. Obostrano su predstavljeni programski zadaci u tekućoj godini, kao i obaveze kojima će se komisije baviti u narednom periodu. Gosp. Edathyja i njegove kolege i saradnike iz Komisije posebno su interesirali problemi u vezi s reformom policije, rad Granične policije BiH, realizacija strategije deminiranja u BiH, te aktivnosti na reformi Ustava BiH.

Članovi Komisije za unutrašnja pitanja Bundestaga snažno su podržali reformske tokove u sektoru odbrane kao i uspješan rad Granične policije BiH. Zabrinjava ih nedostatak političke volje u rješavanju pitanja vezanih za reformu policije. Pri tome su istakli spremnost da pomognu bh.vlastima, prije svega slanjem stručnjaka koji imaju iskustva u uspostavi policijskih agencija u regionu Zapadnog Balkana. Naglasili su da nisu spremni slušati obećanja bez rezultata, te uvjeravanja da se ne može naći rješenje za postojeće probleme. Bosnu i Hercegovinu vide isključivo kao prijateljsku i zemlju u EU i asocijacijama koje vode u EU.

Članovi Zajedničke komisije iznijeli su mišljenje o konkretnim pitanjima. Sugerirali su domaćinima u kojim bi oblastima bilo dobro pomoći Bosni i Hercegovini. Posebno je naglašen interes članova Zajedničke komisije za pomoć vlasti i institucija SR Njemačke na rješavanju problema vezanih za višak naoružanja i vojne opreme.

4. Sastanak s članovima Komisije za vanjsku politiku Bundestaga, gđa Beck Marieluise

U uvodnom dijelu sastanka gđa Beck naglasila je da članovi Komisije veoma dobro poznaju stanje u BiH jer su razmjene delegacija i mišljenja učestale. Politički cilj SR Njemačke je da Bosna i Hercegovina bude dio EU kao zajednička država njenih naroda i građana.

EU i NATO očekuju od bh. vlasti da ubrzano završe organizaciju države koja će biti partner u odnosima sa zemljama u okruženju i zemljama prijateljima. SR Njemačka želi i dalje pružati pomoć BiH, ali je strpljenje njenih građana, kada je u pitanju stanje na Zapadnom Balkanu, na izmaku. Uloženo je mnogo truda i napora, a rezultati su i dalje slabo vidljivi.

Nakon izlaganja gospođe Beck i njenih kolega iz Komisije, članovi Zajedničke komisije uključili su se u diskusiju o brojnim pitanjima. Posebno se razgovaralo o reformi policije, Ustava BiH, aktivnostima izvršne i zakonodavne vlasti, odnosima s predstavnicima međunarodne zajednice u BiH. Gospoda Zrno, Džaferović, Kalabić i Zorić osvrnuli su se, pored navedenih pitanja, i na najnovije mjere visokog predstavnika u BiH. Tokom rasprave i razgovora s članovima Komisije za vanjsku politiku bilo je i različitih mišljenja u tonu koji ima za cilj da se nađu najbolja rješenja za BiH.

Članovi Komisije za vanjsku politiku Bundestaga istakli su bezrezervnu podršku najnovijim odlukama visokog predstavnika u BiH, te sugerirali bezuslovan nastavak razgovora bh. političara o reformi policije i Ustava BiH. Pri tome BiH može računati na pomoć SR Njemačke u svemu što zemlju vodi ka EU i NATO-u.

25. oktobar 2007.

5. Razgovori u Ministarstvu vanjskih poslova SR Njemačke

Dr. Emili Haber, opunomoćenica za Jugoistočnu Evropu i Tursku, sa saradnicima, bila je domaćin članovima Zajedničke komisije tokom sastanka u MVP-u.

U uvodnom dijelu dr. Haber istakla je da je budućnost Zapadnog Balkana u EU i da je Evropa preuzela svoje obaveze u tom pogledu. Na bh. političarima je obaveza da uvjere svoje građane da im je budućnost u Evropi. Izrazila je razočarenje SR Njemačke zbog neispunjenja uslova za potpisivanje Sporazuma o stabilizaciji i pridruživanju. To je neshvatljivo za zvaničnu politiku SR Njemačke. SR Njemačka iz Bosne i Hercegovine u posljednje vrijeme prima zabrinjavajuće informacije. Vlada SR Njemačke podržava put BiH ka euroatlantskim integracijama. Tako u potpunosti podržava i mjere visokog predstavnika za BiH, koje imaju za cilj očuvanje zajedničke države i jačanje njenih funkcija. Za SR Njemačku su neprihvatljivi tonovi o ukidanju OHR-a. SR Njemačka pruža i pružat će snažnu prijateljsku podršku BiH i politiku države treba tako usmjeriti, naglasila je na kraju obraćanja dr. Haber.

Branko Zrno, u pozdravnoj riječi, zahvalio je na iskazanoj podršci, iznoseći presjek aktivnosti Zajedničke komisije.

Adem Huskić istakao je probleme s kojima se BiH suočava kada je u pitanju višak municije i naoružanja. Osvrnuo se na saradnju Granične policije BiH sa institucijama sigurnosti SR Njemačke, na veliki doprinos građana i zvaničnika SR Njemačke u misijama i međunarodnim organizacijama u BiH. Posebno je insistirao na rješavanju i ublažavanju viznog režima za bh. građane.

Jozo Križanović i Slobodan Šaraba dali su svoje viđenje aktuelne političke situacije u BiH, a Šefik Džaferović naglasio je da su EU i NATO jedini put BiH u budućnosti. Istakao je potrebu neodgodive obnove unutrašnje strukture države BiH u skladu sa standardima EU kao i podršku odlukama visokog predstavnika.

Dr. Haber zaključila je sastanak s potpuno jasnim zvaničnim stavovima Vlade SR Njemačke.

Naglasila je da SR Njemačka želi biti prijatelj BiH sa jasnom državnom strukturom. Neophodno je razviti funkcije države u punom kapacitetu i u skladu sa standardima EU. Ministarstvo vanjskih poslova SR Njemačke u potpunosti podržava visokog predstavnika u BiH i donesene mjere koje doprinose rješavanju situacije koja traje dugo i nikome ne donosi dobro. SR Njemačka će pomoći BiH na ublažavanju viznog režima, u uništavanju viška municije i naoružanja, te u pružanju stručnih usluga u oblastima za koje BiH bude ocijenila da su neophodni. Dijalog među bh. političarima treba nastaviti i to je jedina alternativa trenutnom stanju, naglasila je dr. Haber.

6. Sastanak s gosp. Reinholdom Robbeom, ombudsmenom za vojna pitanja Bundestaga

Gosp. Robbe objasnio je način rada službe vojnog ombudsmena. Naglasio je da je to jedinstvena služba koja ima vrlo značajnu ulogu u njemačkom društvu. Cilj rada vojnih ombudsmena je da se spriječi mogućnost zloupotrebe oružanih snaga u političke svrhe. Njemački ustav osnova je za rad vojnog ombudsmena.

Parlament bira vojnog ombudsmena na pet godina. On nije dio izvršne vlasti. U Glavnom uredu radi oko 50 ljudi raznih profila. Vojni ombudsman jednom sedmično posjećuje jedinice Oružanih snaga. U posjete ide nenajavljeno, a izvještaj o njegovom radu je javan. Pri tome pridržava se principa da je vojnik građanin sa svim pravima.

Godišnje se Uredu vojnog ombudsmena obrati oko šest hiljada pripadnika Oružanih snaga.

Pritužbe se odnose na različita pitanja, od pritužbi na uslove života u kasarnama do kršenja ljudskih prava.

Gosp. Robbe je na kraju ponudio pomoć u uspostavljanju Ureda vojnog ombudsmena i u BiH, ako se iskaže interes za uspostavljanje te institucije.

Nakon prezentacije gosp. Robbea, članovi Zajedničke komisije postavljali su pitanja o radu ombudsmena. Razgovaralo se o konkretnim pitanjima iz prakse kao i sagledavanju mogućnosti u uspostavljanju sličnog ureda u BiH.

7. Sastanak s članovima Komisije za odbranu Parlamenta SR Njemačke. Sastankom je predsjedavala gđa Ulrike Merten, predsjednica Komisije

U uvodnom dijelu gđa Merten je, s još pet prisutnih članova Komisije za odbranu i saradnicima, veoma srdačno pozdravila članove Zajedničke komisije, koji su u uzvratnoj posjeti, s obzirom da su članovi Komisije za odbranu Parlamenta SR Njemačke dva puta boravili u BiH. Predstavila je program rada i upoznala članove Zajedničke komisije s nadležnostima Komisije. Posebno se osvrnula na aktivnosti Komisije za odbranu u raspravi o budžetu za odbranu u 2008. godini. Nakon uvodnih obraćanja predsjednice Merten i predsjedavajućeg Zrne, članovi komisija razmijenili su mišljenja o brojnim pitanjima. Posebno interesantna rasprava vodila se o slanju trupa u mirovne misije. Razgovaralo se o misiji u Iraku, Afganistanu, Africi, misiji „Altea“ i KFOR, te o praćenju toka ovih misija i njihovih aktivnosti u pripremi i izvršenju. Članovi Komisije za odbranu Bundestaga veoma su pozitivno ocijenili aktivnost njemačkih trupa u BiH, kao i saradnju s građanima i predstavnicima vlasti u BiH.

Isto tako razmijenjena su mišljenja o postupku sigurnosnih provjera za poslanike u parlamentu. U Bundestagu poslanici ne podliježu obavezi sigurnosne provjere.

Na kraju razgovora konstatirano je da je za članove obje komisije veoma značajna razmjena mišljenja o pitanjima kojima se bave. Predsjednica Merten konstatirala je da je reforma odbrane u BiH posebno interesantna zbog svoje uspješnosti, a rezultati su vidljivi i inspirativni za cijeli region.

8. Sastanak u Ministarstvu unutrašnjih poslova SR Njemačke

Članove Zajedničke komisije primio je gosp. Jentz Krumsieg.

U uvodnom dijelu pohvalno se izrazio o saradnji s policijskim agencijama Ministarstva sigurnosti BiH i Saveznog MUP-a SR Njemačke. Posebno je naglasio dobre rezultate ostvarene u saradnji s Graničnom policijom BiH. Radi se o dugogodišnjoj saradnji koja je bila posebno intenzivna nakon formiranja Granične policije BiH. Savezni MUP SR Njemačke je programski, materijalno i na edukativnom planu imao i ima razvijenu saradnju, u kojoj su se pripadnici i rukovodstvo GPBiH pokazali kao dobar partner. GPBiH ima opremu koju imaju i pripadnici GP SR Njemačke. Partnerska saradnja će se, prema riječima gosp. Krumsiega, nastaviti, ali u promijenjenoj formi. Tu se sada nude isključivo programi obuke za sve strukture Granične policije, a bez donacija, kao što je do sada bio slučaj. Kontakti s predstavnicima GPBiH svakodnevni su. Razmjenjuju se informacije, saradnja se unapređuje i traga za novim sadržajima partnerske saradnje. Članovi Zajedničke komisije razmijenili su mišljenje s gosp. Krumsiegom o prezentaciji koju je dao u uvodnom dijelu. Konstatirano je da dosadašnju praksu treba nastaviti i obogatiti sadržajima koji će u cjelini bilateralnoj saradnji u ovoj oblasti dati dodatni impuls.

9. Sastanak s članovima Grupe prijateljstva - poslanika u Parlamentu SR Njemačke

Prilikom susreta dr. Rainera Stinnera iz Grupe prijateljstva s članovima Zajedničke komisije razmijenjena su mišljenja o brojnim pitanjima iz oblasti bilateralnih odnosa. Dr. Stinner i njegove kolege interesirali su se za brojna aktuelna pitanja i političku situaciju u BiH. Istakli su da daju podršku nastavku prijateljskih odnosa dvije zemlje, u kojima SR Njemačka želi partnerski pomoći. Zabrinuti su za sadašnje stanje u BiH. Posebno ih brine stanje u vezi s reformom policije i Ustava BiH, te suprostavljanje mjerama visokog predstavnika. SR Njemačka je puno uložila u BiH i zemlje Zapadnog Balkana. Ulagat će i dalje, ali sve to zvanična politika mora opravdati pred svojim građanima, koji gube strpljenje. Neshvatljiva im je neodgovornost nekih političara pred svojim biračima i građanima u cjelini.

Nakon uvodnog obraćanja domaćina, Branko Zrno pozdravio je članove Grupe prijateljstva Parlamenta SR Njemačke. Predstavio im je ukratko rad Zajedničke komisije i sadašnje stanje u vezi s reformom sektora odbrane i sigurnosti. Osvrnuo se i na aktuelnu političku situaciju i probleme zbog kojih su domaćini izrazili zabrinutost. Domaćinima je o aktuelnoj situaciji u zemlji govorio i

Šefik Džaferović. Posebno se osvrnuo na funkcioniranje zakonodavne vlasti i razloge koji su, prema njegovom mišljenju, doveli do sadašnje veoma teške situacije. Iznio je moguća rješenja za izlaz iz sadašnje situacije nastojeći uvjeriti članove Grupe prijateljstva da rješenja ima i da visokog predstavnika treba podržati u nastojanjima da pomogne stabilizaciji stanja u BiH.

Članovi Grupe prijateljstva najavili su dolazak u BiH u proljeće 2008. godine. Zamolili su članove Zajedničke komisije da utiču na prevazilaženje sadašnje situacije. Spremni su pomoći na način koji izaberu vlasti BiH. Smatraju da brzo treba reagirati i izvlačiti se iz stanja koje je sumorno i neshvatljivo zemljama EU, a posebno SR Njemačkoj koja bez rezerve želi vidjeti BiH u EU i NATO-u. To je jedno od njenih strateških opredjeljenja.

Razgovorima s Grupom prijateljstva prisustvovao je ambasador BiH u SR Njemačkoj Mitar Kujundžić.

26. oktobar 2007.

10. Sastanak u Ministarstvu odbrane SR Njemačke

Sastankom je predsjedavao gosp. Christian Schmidt, parlamentarni sekretar u Ministarstvu odbrane SR Njemačke.

U uvodnom dijelu gospodin Schmidt upoznao je članove Zajedničke komisije s radom Ministarstva odbrane SR Njemačke. Od ukupno 3450 službenika, oko 450 radi u Berlinu, a 3000 u Bonu. Programski zadaci i ciljevi u radu jasno su definirani. Traži se sve bolja koordinacija u okviru EU. Aktivnosti SR Njemačke u okviru NATO-a i EU moraju biti još efikasnije. Bilateralnu saradnju s BiH ocijenio je dobrom, s brojnim mogućnostima za daljnje unapređenje. Želio je čuti od članova Zajedničke komisije dokle se stiglo u procesu reforme i tranzicije sektora odbrane, te kako se ostvaruju ciljevi definirani kroz program Partnerstvo za mir.

Nakon uvodnog obraćanja gosp. Schmidta, predsjedavajući Zrno pozdravio je domaćine, a Šefik Džaferović informirao gosp. Schmidta o aktivnostima Zajedničke komisije o tokovima reforme odbrane, o aktivnostima bh. vlasti vezanim za program Partnerstvo za mir, kao i o pitanjima za koja je gosp. Schmidt izrazio interesovanje u uvodnom dijelu.

Nakon obraćanja članova Zajedničke komisije, gospodin Schmidt istakao je sljedeće:

- Ministarstvo odbrane SR Njemačke veoma je zainteresirano za unapređenje bilateralne saradnje. To se posebno odnosi na oblast obrazovanja i razmjene informacija.
- MO SR Njemačke spremno je pomoći BiH u uspostavi Ureda vojnog ombudsmena.
- MO SR Njemačke sugerira bh. vlastima (MVPBiH i MOBiH) da se što prije razmotri pitanje uspostave Ureda vojnog atašea pri Ambasadi BiH u SRNJ, s ciljem daljnjeg unapređenja bilateralnih odnosa u oblasti odbrane.
- Neophodno je intenzivirati razgovore o zajedničkom učešću u operacijama podrške miru i korištenju vojne opreme, s obzirom da članstvo u NATO-u iziskuje razvijanje standarda, intenziviranje bilateralne saradnje s članicama NATO, te širenje učešća u drugim misijama.
- MOBiH treba što prije razmotriti sve aspekte korištenja objekata u kasarni Rajlovac (objekte koje je koristio kontingent vojnika SR Njemačke) i predložiti najpovoljnija rješenja koja su interes bh. strane.
- SR Njemačka izražava bezrezervnu podršku BiH na njenom putu u NATO. Shodno tome traži se da svi relevantni subjekti u BiH utiču na mijenjanje trenutnog stanja i političke situacije koja nikome ne donosi dobro.
- Neophodno je nastaviti dobre kontakte i učiniti sve za stabilizaciju zemlje. U tom kontekstu bi se situacija u regionu poboljšala i odluke o budućem statusu Kosova bile bi daleko bezbolnije.

Razgovorima u MO SR Njemačke prisustvovao je ambasador BiH u SR Njemačkoj Mitar Kujundžić.

11. Posjeta Akademiji za informacije i komunikacije (AIK) MO SR Njemačke

Brigadir Alex Hecht, komandant AIK sa saradnicima, primio je članove Zajedničke komisije u sjedištu Akademije u Strauzbergu.

U uvodnom dijelu istakao je ulogu, zadatke i strukturu AIK- a.

To je centralna ustanova za obuku kadrova koji rade s javnošću. Širok je spektar aktivnosti od kojih su naučni rad i obrazovanje prioriteti.

Obrazovanje kadrova MO SR Njemačke osmišljeno je godišnjim i srednjoročnim programima rada. Nakon uvodne prezentacije brigadira Hechta, članovima Zajedničke komisije obratio se dr. Christof Meier, direktor Instituta za sociologiju MO SR Njemačke. Prezentirao je rad Instituta i posebno istakao zadatke u oblasti naučnih ekspertiza, preporuka nakon obavljenih istraživanja i zahtjeve u empirijskim istraživanjima. Institut radi za potrebe MO SR Njemačke i ima punu slobodu u svom radu kada je u pitanju struka i korištenje metoda naučnog rada.

Brigadir Christian Niebihr održao je prezentaciju o temi: „Rukovođenje ljudima“. Istakao je koncepciju unutrašnjeg rukovođenja, koncepciju rukovođenja ljudima, koncept političkog obrazovanja te pravne regulative i vojnički poredak.

U svom izlaganju osvrnuo se i na temu: „Politika i građanska prava i obaveze“, koncept moralnog vaspitanja, pravni sektor i mogućnosti bilateralne saradnje.

Brigadir Hecht istakao je da već u 2008. godini pripadnici OSBiH i MOBiH mogu računati na mogućnost učešća na kursovima koji će biti ponuđeni MOBiH. Preduslov za učešće na kursovima je dobro znanje njemačkog i engleskog jezika.

Službenim putem MOBiH će i zvanično dobiti ponudu za slanje kadrova na kurseve, koji svojim programima obuhvataju obuku kadrova za informiranje javnosti. Program kurseva bit će urađen u skladu s potrebama i u početku će trajati do sedam radnih dana.

ZAKLJUČCI:

1. Posjeta Parlamentu i organima i tijelima izvršne vlasti SR Njemačke bila je izuzetno korisna i protekla je u prijateljskoj atmosferi. Razmijenjena su mišljenja o brojnim pitanjima, prije svega onim koja se odnose na rad tijela dva parlamenta i funkciju parlamentarnog nadzora sektora odbrane i sigurnosti. Posebno je bila korisna razmjena mišljenja s predstavnicima Ministarstva vanjskih poslova, Ministarstva unutrašnjih poslova i Ministarstva odbrane SR Njemačke.
2. Razgovori sa zamjenikom direktora parlamentarne administracije, Komisijom za unutrašnja pitanja, Komisijom za vanjske poslove, Komisijom za odbranu i Grupom prijateljstva Parlamenta SR Njemačke potvrdili su bezrezervnu podršku BiH na njenom putu ka EU i NATO-u.
3. Susret s predstavnicima MVP SR Njemačke potvrdio je punu privrženost i podršku SR Njemačke putu BiH ka EU i NATO-u. Pomoć u pronalaženju prihvatljivih rješenja, partnerski odnosi, prijateljska podrška su opredjeljenje SR Njemačke u bilateralnoj saradnji. SR Njemačka bezrezervno podržava visokog predstavnika u BiH i njegove odluke. Shodno tome, od bh. vlasti traži se da što prije riješe pitanje reforme policije i Ustava BiH i tako ispune uslove za potpisivanje Ugovora o stabilizaciji i pridruživanju. Na putu pronalaženja rješenja imat će punu stručnu i političku pomoć vlasti SR Njemačke.

4. Razgovori s predstavnicima Ministarstva unutrašnjih poslova i Ministarstva odbrane SR Njemačke bili su konkretni i odnosili su se na pitanja koja su bitna za bilateralne odnose u ovim oblastima. Ohrabrujuće su informacije o saradnji Ministarstva odbrane BiH i Granične policije BiH s pomenutim ministarstvima. Pri tome, spremnost predstavnika Ministarstva odbrane i MUP-a SR Njemačke za unapređenje bilateralne saradnje treba iskoristiti na pravi način.
O temama razgovora u MO i MUP-u SR Njemačke koje su navedene u informaciji bit će informirani MOBiH i GPBiH.
5. Ministarstvu odbrane BiH i Ministarstvu vanjskih poslova BiH treba predložiti da što prije razmotre pitanje otvaranja Ureda vojnog atašea u Ambasadi BiH u SR Njemačkoj.

Predsjedavajući
Zajedničke komisije
Branko Zrno

Dostaviti i:

- kolegijima oba doma PSBiH
- Kolegiju Sekretarijata PSBiH
- Sektoru za međunarodnu saradnju i protokol
- komisijama za vanjsku politiku oba doma PSBiH
- Zajedničkoj komisiji za evropske integracije BiH
- Ministarstvu odbrane BiH
- Ministarstvu vanjskih poslova BiH
- Graničnoj policiji BiH
- Ambasadi BiH u SR Njemačkoj
- Misiji OSCE-a u BiH